

Jém wiñtipic carta jém ijayñewiip jém Xiwan

Nimpa jém Xiwan iga iixñe jém
Cristo

(Jn. 1:1; Ap. 19:13)

1 Jém Cristo íttim idíc dende wiñigam cuando danam i yíp mundo. Pero siip wiap mannímáy iga ánixñeta ánixcuymi. Ammatoḡneta. Anámta. Antsic con aḡci. Iñiyítim jém Aḡmaḡi, je jém vida jém tachiiñewiip Dios. ²Awiñquejayta jém vida. Ánixñeta, jeeyucmi wiap manaḡmadáy iga núcneum y wiap manaḡquejay iga jém Cristo jeam jém vida jém dápic cuyajpa. Ittim idíc dende wiñigam con jém tanJatun Dios, jesic ocmi awiñquejayta. ³Siip manaḡmadáypa tí ánixñeta y tí ammatoḡneta iga wiñiñ tanaiḡta tumḡti jixi juustsim aich anaiḡta tumḡti jixi con tanJatun Dios y con jém Jesucristo jém Dios iManic. ⁴Jeeyucmi manjáyáypa iga iniíttámiñ jém maymáyají jém numapic.

Jém tanJatun Dios tum wibic
jucti agui witsocpa

⁵Yfbam jém wibic aḡmaḡi jém tanquejayñewiip jém Jesucristo. Siip manaḡmadáypa mimichám.

Nimpa jém aḡmaḡi iga jém tanJatun Dios jex juuts tum wibic jucti. Agui wi tsoepa. Juḡ it Dios dá i piichi, je dá táḡcafy ni uxatḡ. ⁶Siiga tanimpa iga tumḡti tanjixi con tanJatun Dios, pero tasiibatim piichcim, jesic tamigóypa. Dá tanwatpa juuts nimpa jém numapic aḡmaḡi. ⁷Pero siiga tasiiba juctiantsočajom juuts jém tanJatun Dios it jém juctiantsočajom, jesic numa tumḡti jixi tanaiḡta y jém Jesucristo iñiipiñ, jém Dios iManic, taccáyáypa itumpiy jém tantánca.

⁸Pero siiga tanjixpa iga dá tatáncafy, jesic tanamigóyayḡp tanyaac. Dá tanai jém numapic aḡmaḡi tánanamanjom. ⁹Pero siiga tanaḡmadáypa Dios iga agui tammalwatne, jesic tanjodotḡ iga tayoxpátpa porque Dios tajjycámayñe iga tayoxpátpa. Tawitsagáypa itumpiy jém tantánca, taccáyáypa tánanamanjom. ¹⁰Pero siiga tanimpa iga dá tatáncafy, jesic tamigóypa y tanimpa iga migóypatim jém tanJatun Dios. Quejpa iga da numa tancupicne jém inmaḡi.

Jém Jesucristo je jém tacupujpáppic

2 Mammanictam, siip
manjáyáypa yíp toḡo iga

odoy immalwadiñ. Pero siiga i imalwatne, jem Jesucristo wiap icupuj jem Dios iwiñjom porque je da ti mal iwat. ²Accaata jem Cristo iga tayojoyta tantanca. Y da no más taichfam tayojoyta jem tantanca, pero iyojáyim itumpiy jem pixiñtam itanca icuwíi yíp naxyucmi.

³Siiga seguido tanwatpa juuts tanímáypa Dios, jesic tanjodon iga numa tánixpicne jem Cristo. ⁴Pero siiga tum pixiñ nimpa iga: Ich ánixpicpa jem Cristo, pero da iwatpa juuts nimpa jem wibic anmañi, jesic migóypa jem pixiñ. Da iniñ jem numapic anmañi ianamanjom. ⁵Pero siiga tum pixiñ iwatpa juuts nimpa jem Cristo inmañi, jesic numa quejpa iga jem pixiñ tsam itoypa Dios. Siiga seguido tanwatpa juuts nimpa jem Cristo inmañi, jesic tanjodon iga tanwaganaita jem tanJatuñ Dios. ⁶Siiga tum pixiñ nimpa iga: Ich anwaganait tanJatuñ Dios, jesic wi iga iwadiñ jem witampic cosa juuts iwatpa jem Jesucristo.

Jém jomipic anquímayooyi

⁷Mantíwítam, da manjáyáypa tum jomipic anquímayooyi, pero manjáyáypa jeetim pecapic anquímayooyi jem iniitwiip dende wiñi. Yíp anquímayooyi jem mojiwip impictsonja. ⁸Manjáyáypa juuts tum jomipic anquímayooyi porque Cristo oy tanquejáy iga tanatoyámtañ y mimichtam inwattampa jempic. Siip nasneum jem piichi y núcneum jem numapic juctiantsoca.

⁹Siiga nimpa tum pixiñ iga: Ich aít jem juctiantsocajom, pero

ijóyixpa jem itíwítam, jesic migóypa jem pixiñ. Quejpa iga danam putne jem piichcim. ¹⁰Pero siiga tum pixiñ itoypa itíwi, jesic it jem juctiantsocajom y da i wiap icmalwat. ¹¹Pero siiga tum pixiñ ijóyixpa jem itíwi, jesic tsáypa jem piichcim. Da ichacpa iga imalwatpa. Jexpic pixiñ da ijodon juñ nicpa porque jem piichi da iguixixóypa.

¹²Mammanictam, manjáyáypa porque Dios miwadayneum perdón jem inñanca porque jem Cristo miyojáy jem inñanca. ¹³Michamítampic, manjáyáypa porque incupicneum jem Cristo jem itwiip dende wiñigam. Manjáyáypaím, jem dapicnam michamítam, porque incoñwiñneum jem Wocciwiñ. Manjáyáypaím michixtam porque inixpicneta jem tanJatuñ Dios. ¹⁴Manjáyáypa michamítampic porque incupicneum jem Cristo jem itwiip dende wiñigam. Manjáyáypaím jem dapicnam michamítam porque tsam miwiap. Iniit jem Dios inmañi inanamanjom. Incoñwiñneum jem Wocciwiñ.

¹⁵Tsaci iga inñoypa itumpiy jem malopic cosa jem ityajwiip yíp naxyucmi. Porque siiga tum pixiñ itoypa jem malopic cosa jem ityajwiip yíp naxyucmi, jesic da itoypa jem tanJatuñ Dios. ¹⁶Jém da wibic pixiñtam tsam icusúníypa itumpiy jem malopic cosa jem ijisnewiip ianamanjom. Títam iixpa imalwatpa, icusúníypaím. Agui nacujítpa iyaac iga agui wí it. Itumpiy yíp malopic jixi jem ityajwiip yíp naxyucmi da

miñpa de Dios. Jém malopic jixi tsucumpa yíp naxyucmipic pixiñtam iixianjom. ¹⁷ Cuyajpa yíp mundo y cuyajpañtam ifumpiy jém malopic cusuniyooyi. Pero jém iwatyajpáppic juuts ixunpa Dios dá nunca cuyajpa. Jeeyaj tsíyyajpa para siempre.

**Jém Cristo ienemigo je
jém contracrismo**

¹⁸ Mammañictam, siip núctoobam jém iñajpígam jama. Mimichfam immatoñneta iga miñpa tum pixiñ nímanjaayap iga jeam jém Cristo. Tsam añapa contra jém Cristo. Siip núcneum wañi jém añayajpáppic contra jém Cristo. Jeeyucmi tanjodoñ iga núctoobam jém iñajpígam jama. ¹⁹ Jeeyaj ityay idic con taichfam, pero da iñuntacupicneyaj Dios. Jesic ocmi cupundayaj con taichfam. Siiga numa icupicyajpa Dios, jesic tienes que tanwaganaiítámpa hasta siip. Pero cupundayaj iga quejiñ iga da tawaganaiíta ni tum de jeeyaj.

²⁰ Pero jém tánQmi Cristo michiñneta jém Dios iAnama, jeeyucmi iñtumpiyfam wiap iñcutiyyiñta jém wítampic añquímayooyi. ²¹ Jesic dá manjáyáypa iga dá iñcutiyyiñta jém numapic añquímayooyi. Manjáyáypa porque mich iñxpicpa jém numapic añquímayooyi. Iñjodoñtim iga jém numapic añquímayooyi da je miñooyi.

²² ¿Jesic iapaap jém migoypaap? Jém migoypaap je jém nimpáppic iga jém Jesús da je Cristo jém icutsatnewiip Dios. Jém migóypáppic je jém contracrismo.

Yíp malopic pixiñ iñnécpa jém tanJatuñ Dios y iñnécpañtam jém Dios iManic. ²³ Porque siiga tum pixiñ dá icupicpa jém Dios iManic, jesic dáñtam iixpicpa jém tanJatuñ Dios. Pero siiga tum pixiñ icupicpa jém Dios iManic, jesic iixpicpañtam tanJatuñ Dios.

²⁴ Jeeyucmi manñmáypa iga odoy tsaci iga iñcupictámpa jém wibic añquímayooyi jém mojniip miñquejayfamta. Siiga dá iñhacpa, jesic seguido miwaganaiítámpa jém tanJatuñ Dios y jém iManic Jesucristo. ²⁵ Jém Jesucristo tajiycamayñe iga tachiiba jém vida iga nicpa tañti con Dios.

²⁶ Manjáyáypa iga tsam it jém tamigóyayajpáppic. ²⁷ Pero michtam iniitfamum jém Dios iAnama jém michiñnewiip jém Cristo. Iniiñtam iññamanjom. Jeeyucmi dá iñxunpa iga i miñquejaypa porque jém Dios iAnama miñquejaytámpa ifumpiy jém wibic jixi. Je jém numapic añquímayooyi, dá je miñooyi. Jesic odoy tsaci iga iñwatpa juuts ixunpa jém Cristo juuts miñquejay jém Dios iAnama.

²⁸ Siip, mammañictam, wagañtaami con jém tánQmi Jesucristo, jesic dá tanjintámpa cuando miñgacpa yíp naxyucmi, dá tatsaátámpa cuando tanánjammocpa. ²⁹ Michtam iñjodoñ iga dá tancañy jém Cristo. Jesic jodoñgataami iga ifumpiy jém iwíwatyajpáppic nayñeyaj iga Cristo imanigap.

**Nimpa jém Xiwan ti iwatyajpa
jém Dios imanictam**

3 Ixi iga tsam pimi tatoypa tanJatuñ Dios. Jeeyucmi

tatsíyámpa iga Dios tamaníctam. Yíp dá je migooyi. Taichám jem Dios tamaníctam. Jeeyucmi jem dápic icupicyajpa Dios dá tawixiyajpa porque dálim iixpicyajpa jem tanJatuj Dios.

²Mantíwítam mantoyámpáppic, siip taichám Dios tamaníctam. Dá tanjodoj siip juutspic tapixiñtam tatsíyámpa cuando tampictsojpa jem jomipic tammijtay. Pero tanjodoj iga cuando miñacpa yíp naxyucmi jem tánQmi Jesucristo, jesic tatsíyámpa jextim juuts jem Cristo. Porque cuando miñacpa jem tánQmi, jesic tánixtámpa juutspic pixiñ. ³Ítumpiy jem pixiñtam jem injójocyajpáppic iga miñacpa jem tánQmi Cristo, tienes que ichacyajpa jem itánca iga cuáyñeiñ jem ianama porque dá táncaíy jem Cristo.

⁴Jém pixiñtam, jem iwatyajpáppic tájca, dá icupicne jem Dios inquímayooyi. Ítumpiy jem tájca ít en contra de Dios inquímayooyi.

⁵Michám injodojtam iga jem Cristo oy yíp naxyucmi iga iccáyáypa jem pixiñtam itánca. Injodojtim iga jem Cristo dá táncaíy ni uxaj. ⁶Siiga tum pixiñ iwaganait jem Cristo, jesic dá seguido iwatpa tájca. Pero itumpiy jem pixiñtam jem imalwatyajpáppic dá icupicyajpa ni dá iixpicyajpa Dios. ⁷Mammaníctam, cuidado iga i mimigóyáypa iga mictsactámpa jem Dios inmaí. Siiga tum pixiñ seguido iwatpa juuts ixunpa Dios, jesic wibic pixiñ, jextim juuts jem tánQmi Cristo. ⁸Pero siiga tum pixiñ dá ichacpa itánca, jesic quejpa iga tsýpa juuts jem

Wocciwiñ imiichi. Porque dende wiñigam imalwatpa jem Wocciwiñ. Jeeyucmi jem Dios imanic oy yíp naxyucmi iga iccuyajáypa jem Wocciwiñ ipimi.

⁹Jém Diospic imaníctam ichacpa jem itánca. Dá más imalwatpa. Siiga tanaít jem vida jem Diospic tachiiñe, jesic dá wiap tammalwat seguido porque Dios tamanigane.

¹⁰Asíam tanjodónaj iapaap jem Dios imaníctam y iapaap jem Wocciwiñ imaníctam. Jém dápic iwíwatpa dá je Dios imaníc ni jem dápic itoypa itíwítam.

Jém Dios ipixiñtam natoyajtap con jem itíwítam

¹¹Wiñigam tampictsoj yíp anquímayooyi: Wí iga tanatoytamtáñ con jem tantíwítam.

¹²Dá wí siiga tanwatpa juuts jem Caín, porque je jem Wocciwiñ imiichi, icca itíwi. ¿Tíiga icca itíwi? Porque jem Caín iwatpa juuts ixunpa jem Wocciwiñ, pero jem itíwi iwatpa juuts ixunpa Dios.

¹³Mantíwítam, odoj pooñanjamtaami siiga jem malopic pixiñtam tsam mijóyixpa.

¹⁴Tatsíyñeta idic juuts tum pixiñ caane, pero siip taichám tavivo. Tanjodoj iga tavivo porque siip tantoypa jem tantíwítam. Jém pixiñ jem dápic itoypa itíwi jex juuts tum pixiñ caane. ¹⁵Ítumpiy jem ijóyixpáppic itíwi jex juuts tum accaoypaap. Y michám injodojtam iga jem accaoypáppic pixiñ dá iniñ jem vida jem dápic cuyajpa.

¹⁶Jesic asíam tancutiiyíypa jutsap tantoy jem tantíwítam porque jem Cristo iyaac nachiiñá iga accaata

iga tajojáy tantánca. Jesic wíim iga tanjígwiñ iga taccaatap iga tanyoxpátpa jém tantíwítam jém icupicneyajwiip Jesús. ¹⁷Siiga tum pxiñ tsam iniit iwíccuy y itumpiy cosa y iix iga pími yaachap jém itíwi, pero da iyaachanjampa, jesic quejpa iga jém pxiñ da itoypa Dios. ¹⁸Mammanictam, da wí iga tannímáypa jém tantíwi iga: Mantíwi, tsam mantoypa, pero ocmi da tanyoxpátpa. Siiga jém iníwi itogóyay algun ti, jesic yoxpaati, yaachanjami.

Jutsap tanjodóna iga Diosam tamiichíam

¹⁹Siiga tantoypa tantíwítam, jesic tanjodon iga tanaít jém numapic anquímayooyi. Jesic da tançinpa iga tanúcpa jém Dios iwiñjom.

²⁰Siiga tanjísipa tánanamannjom iga agui tammalwatne idic, jesic odooy wadaayi caso porque Dios más mij que taichám y Dios iixpicpa itumpiy jém pxiñtam ianama.

²¹Jesapítim, mantíwítam, siiga da tanjísipa tánanamannjom iga agui tammalwatne, jesic da tançinpa iga tanúcpa jém Dios iwiñjom. ²²Siiga tanwágáypa Dios alguna cosa, jesic tachiiba porque seguido tançupicpa jém Dios inquímayooyi y tanwatpa juuts iwianjam Dios. ²³Nimpa jém Dios inquímayooyi iga tançupictamiñ jém iManic iníyi, jém Jesucristo. Nimpaítim iga tanatoytamtáin con jém tantíwítam juuts tanímayñe.

²⁴Itumpiy jém icupicneyajwiip jém Dios inquímayooyi ityaj con Dios. Ífíim Dios con jém ipixiñtam. Tanjodon iga tanwaganait Dios porque tachiiñeta jém Dios iAnama.

Quejpa juppic jém malopic espíritu jém tamigóyaypáppic

4 Mantíwítam mantoytampáppic, odooy cupici itumpiy jém anmatciwiñ jém nimyaypáppic iga iniit jém Dios iAnama. Pero wiñti cutiitsi jém inquímayooyi, jesic quejpa siiga Dios icutsatne. Porque tsam it jém malopic anmatciwiñ jém tamigóyaypáppic. Ininúcyajpa jém migooyi jutinquej. ²Siiga jém anmatciwiñ nimpa iga jém Jesucristo oy yíp naxyucmi juuts tum pxiñ, maayítim juuts taichám, jesic tanjodon iga jém anmatciwiñ iniit jém Dios iAnama. Jempigam tánixpicpa siiga iniit jém Dios iAnama. ³Pero siiga da inmatpa jém pxiñ iga maayítim jém Cristo juuts taichám, jesic da inij jém Dios iAnama. Jém pxiñ iniit jém mal espíritu. Y jém mal espíritu it en contra de jém Cristo. Michám injodontam iga miñpa jém anpáppic contra jém Cristo y siip núcneum yíp naxyucmi.

⁴Pero mimichám, mammanictam, Dios mimiichíam. Incoñwiyñeum jém malopic anmatciwiñ jém tamigóyayyajpaap. Porque jém Dios iAnama, jém iniitwiip inanamannjom, más wiap que jém iniitwiip jém malopic pxiñtam inanamannjom, jém dapic icupicneyaj Dios. ⁵Jém malopic anmatciwiñ iniityaj yíp naxyucmic jixi, jesic cuando inmatyajpa jém malopic anquímayooyi, yíp naxyucmic pxiñtam imatonyajpa. ⁶Pero taichám Diosam tamiichíam. Cuando tananmatpa jém Dios

inmáti, jesic jém icupicneyajwiip Dios imatoŋyajpa. Pero jém ďapic je Dios imiichi jeeyaj ďa imatoŋyajpa. Jempigam wiap táníxpic jém Dios iĀnama y jém mal espíritu jém tamigóyapáppic.

Dios tsam tóyóyapa

⁷Mantiwítam mantoytampáppic, wi iga taichám tanatoytamtaiñ con jém tantiwítam porque Dios tachiine jém jixi iga tanatoytamtaiñ. Y itumpiy jém itoyyapáppic itíwi je jém Dios imanictam y jeeyaj iixpicaypa Dios. ⁸Jém ďapic itoyya itíwi jesic ďatim iixpicpa Dios porque tsam tóyóyapa Dios. ⁹Dios tanquejáy juťpic tatoypa cuando icutsat yíp naxyucmi jém tumpic iManic iga tachiitámiñ jém vida jém ďapic cuyajpa. ¹⁰Yiimpic quejpa jém wibic tóyooyi. Āa iga tantoypa Dios, pero iga Dios tanoytámpa taichám. Jeeyucmi icutsat iManic iga tajojáy tantánca.

¹¹Mantiwítam mantoytampáppic, iga tsam tatoypa Dios jesic wítim iga tanatoytamtaiñ con jém tantiwítam. ¹²Āa i nunca oypa iix jém tanJatuj Dios, pero siiga tanatoytamtap con tantiwítam, jesic tanjodon iga tanaitá Dios tánanamanjom. Y másim quejpa iga tatóyóyapa. ¹³Dios tachiineta jém iĀnama, jeeyucmi tanjodon iga taiť con Dios y Dios íf con taichám. ¹⁴Anyaac ánixneta jém Jesucristo y siip ananmattámpa juťinquej iga jém tanJatuj Dios icutsat jém iManic yíp naxyucmi iga iciacputpa itumpiy jém pixiñtam jém ityajwiip yíp naxyucmi. ¹⁵Siiga tum pixiñ inmadáypa jém itíwítam iga jém

Jesucristo jém Dios iManic, jesic jém pixiñ íf con Dios y jém Dios íf con jém pixiñ.

¹⁶Tanjodon y tancupicpa iga Dios tsam tatoypa porque Dios tsam tóyóyapa. Y jém pixiñ jém tóyoypáppic íf con Dios y Dios íftim con jém pixiñ. ¹⁷Siiga seguido taiťtámpa con Dios, jesic más tancutiyyitámpa jutsap tantoy Dios. Y cuando núcpa jém jama iga Dios ichiiba castigo jém malopic pixiñtam, jesic taichám Āa tanjontámpa. Taichám tajextim juuts jém Cristo cuando jáy íti yíp naxyucmi. ¹⁸Juť íf jém tóyooyi Āa i jém cñi porque jém numapic tóyooyi iccáypa itumpiy jém cñi. Pero siiga tum pixiñ icñjpa jém Dios icastigo, jesic quejpa iga Āa inií jém numapic tóyooyi.

¹⁹Taichám tantoytámpa Dios porque wiñti tatoyta. ²⁰Pero siiga tum pixiñ nimpa iga: Ich antoypa Dios, pero ijóyixpa itíwi, jesic migóyapa jém pixiñ. Porque siiga Āa itoyya itíwi jém iixñewiip, jesic ďatim wiap itoy jém Dios jém ďapic táníxpa. ²¹Dios tachi yíp anquímayooyi: “Siiga inťoyya Dios, jesic toyítim mex jém inťiwítam.”

Jém icupicneyajwiip jém Cristo icoñwiyneum jém Wocciwiñ ipimi

5 Siiga incupicpa iga jém Jesús je jém Cristo, jesic Dios mimanic. Siiga tantoypa jém Jatujpic, jesic tienes que tantoytámpatim jém imanictam. ²Jesic tanjodon iga numa tantoypa jém Dios imanictam siiga tantoypa Dios y tanwattámpa juuts tanímáypa. ³Siiga tanwatpa juuts

nĩmpa jém Dios inqúimayooyi, jesic quejpa iga tantoypa Dios. Y jém Dios inqúimayooyi da tãñca iga tañwatpa. ⁴Porque jém Dios imañictam wiap icoñwíy ítũmpiy jém malopic jixi jém ítayajwiip yíp naxyucmi. Wiap tañcoñwíy porque tañcupicne jém Jesucristo. ⁵Pero nada más jém icupicneyajwiip iga jém Jesús je jém Dios iManic wiap icoñwíy ítũmpiy jém malopic jixi.

**Tucuten testigo tañquejáypa
iapaap jém Jesucristo**

⁶Oy íti jém Jesucristo yíp naxyucmi, acchiñta niicim, ítegáy inñipiñ jém cunusyucmi. Da je solamente con ni, pero tañquejayta con jém ni y con jém niipiñ iga da je miñooyi. Dios iAnama tsýpañim juuts tum testigo iga jém oyñewiip numa jém Dios iManic porque jém Dios iAnama da inisiiba jém miñooyi. ⁷Tucuten testigo íf siñyucmi: jém tanJatuj Dios, jém tánQmi Jesucristo y jém Dios iAnama. Icutres tsý juuts tumti. ⁸Íftim tucuten testigo yíp naxyucmi: jém Dios iAnama tsý juuts tum testigo, y jém ni tsý juuts tum testigo, y jém niipiñ tsýñim juuts tum testigo. Icutres íf de acuerdo. ⁹Tañcupicpa jém pixiñtam cuando inmatyajpa juuts testigo. Pero más wibic testigo jém tanJatuj Dios. Tanímayñe iga Jesucristo je jém iManic. ¹⁰Jém icupicneyajwiip jém Dios iManic chiiñeta jixi iqnamanjom iga numa jém Jesús je jém Dios iManic. Pero jém pixiñ, jém dápic icupicpa Dios, nĩmpa iga miñoypa jém tanJatuj Dios porque da icupicpa

ítam tañmadáy Dios de jém iManic. ¹¹Tañjodóneta iga Dios tachiññetámum jém vida jém dápic cuyajpa, yíp vida iniif jém Dios iManic. ¹²Jém iniifwiip jém iManic, iniifum jém vida. Pero jém dápic iniij jém Dios iManic, je da iniij jém vida.

¹³Manjáyáypa mimichfam jém inçupicnetañwiip jém Dios iManic inñiyi iga inñuntawjodoj iga impictsoñeta jém vida jém dápic cuyajpa.

¹⁴Siiga tañwágáypa Dios jém witampic cosa juuts ixunpa Dios, jesic tanjodoj iga tamatoñpa. Tanjodoj iga Dios iccupacpa juuts tajycamayñe. ¹⁵Siiga tanjodoj iga Dios tamatoñpa cuando tanañwejpátpa, jesic tanjodojtim iga tachiññeum jém wibic cosa jém tañwágayñewiip. ¹⁶Siiga tánixpa tum tantíwi iwat tum tãñca jém dápic iccaaba, jesic wí iga tanañwejpádáyin Dios para je. Jesic Dios ichiiba vida jém tantíwi siiga da iwat jém tãñca jém taccaapápic. Porque íf jém tãñca jém taccaapápic. Da mannímáypa iga ininwejpádáyin Dios para jém pixiñ siiga iwatpa jexpic tãñca. ¹⁷Ítũmpiy jém malopic cosa jém iwatyajpápic jém pixiñtam tãñcañim. Pero íf jém tãñca jém dápic iccaaba jém pixiñ.

¹⁸Tanjodoj iga jém tsýñeyajwiip juuts jém Dios imañictam ichacneyajum iga imalwatpa porque jém Cristo iwatpa cuenta iga jém Wocciwiñ odoy wiañi icmalwat.

¹⁹Tanjodoj iga Dios tamaniganeta. Tanjodojtim iga ítũmpiy jém malopic pixiñtam yíp naxyucmi ítayaj jém Wocciwiñ iciñjom.

²⁰Tanjodon̄tim iga oy yíp
 naxyucmi jém Dios iM̄anic iga
 tachiiba jém wib̄ic j̄ixi iga w̄iaĩñ
 tañcutīiȳȳ jupp̄ic jém n̄umap̄ic
 Dios. Sīip tañwaganaīt̄ámpa jém
 n̄umap̄ic Dios, je jém tánQ̄mi

Jesucristo. Je jém n̄umap̄ic Dios
 jém tachīiñewīip jém vida jém
 ádap̄ic cuyajpa. ²¹Mamman̄ictam,
 odoy j̄istaami jém watnas jém
 ádap̄ic je nunta Dios. Jemum
 cuyaj.